




MOLAETSA OA MOHLOMPHEHI TONA-KHOLO

DR. MOTSOAHAE THOMAS THABANE

OA LITAKALETSO TSA MAHLOHONOLO

A KERESEMESE

HO SECHABA SA BASOTHO

LA 24 TŠITOE, 2019

Kea le lumelisa bana ba Thesele, Maapara-kobo a matle!

Re boetse re fihlile nakong eo re hopolang ho tsoaloa hoa mopholosi oa rona, Jesu Krete. Joalo ka sechaba sa balumeli, ke nako eo re kenang ho eona ka thabo e kholo le ho hetla morao ho itekola.

Re le sechaba sa Basotho, re kena Keresemeseng ea selemo sena sa 2019, ka motlotlo ka ha e bile selemo seo re ileng ra ithukhubetsa ka matla ho phethahatsa moralo oa naha oa Tlhopho-Bocha e akaretsang.

Re fihla qetetllong ea selemo sena, e le ha re geta ho phethela karolo ea pele ea ho bopa tlaleho ea seo Basotho, ka boemeli ba mafapha a bona ohle e le sechaba, ba lumellaneng hore Tlhopho-Bocha e tle e be sona.

Tlaleho ena ke lesupa-tsela le tla re tataisa ho itekola hammoho re le sechaba, e le hore re tle re ipone phoso moo re lokelang ho etsa joalo, le ho iphumanela litharollo tsa moshoelella tsa mathata a re tšoentseng nako e fetang lilemo tse mashome a mahlano joale.

Ke etsa boipiletso bo tsoang botebong ba pelo ea ka, hore, re tle re itumelle ho sebetsa le ho sebelisana ka 'nete eohle, 'me ka moea o motle, ha re fetela mokhahlelong o latelang, oa ho rala le ho etsa liphetoho moo ho lokelang joalo, molemong oa hore Mosotho e mong le e mong a tle a phele ka boiketlo le ka khotso naheng ena ea ha bo bona.

Leha ho le joalo, re lokela ho amohela hore Tlhopho-Bocha ha e na ho re tlišetsa likarabo le litharollo tsa lintho tsohle tse re tšoenyang re le sechaba. Har'a tse ling re ka qolla liketso tsa

litlolo tsa molao tse jeleng setsi hoo li seng li
hlokisa Basotho boiketlo kahar'a metse le metsana
eo ba ahileng ho eona, haholo-holo ka eona nako
ena eo malapa a kopanang hammoho ho ja le ho
thaba malapeng a bona le libakeng tse ling tsa
boithabiso.

Ke rata ho le tiisetša hore Mafapha a Tšireletso,
eleng Sesole, Sepolesa, Mautloela le Litsi tsa
Tlhabollo ea Batšoarua a malala a laotsoe ho
sireletsa maphelo le thepa ea lona, 'me ka thuso
ea rona re le sechaba, le ka phetoho ea boitšoarō
feela, re tla fenya tlolo ea molao.

Ka hona ke laela Mafapha a Tšireletso ka mekhahlelo ena eo ke e boletseng ho sebetsa ka thata ho thibela litlolo tsa molao nakong ena ea Keresemese le ketekelo ea selemo se secha.

Basotho ba heso, ha re keneng ka thabo Keresemeseng ena le malapa a rona. Leha ho le joalo, ke ipiletsa ho batho ba bacha hore, ba natefeloe ka boikarabello. Qobang tšebeliso e mpe ea tai le lithethefatsi.

Ke lakatsa ho le hopotsa hape sechaba sa heso hore Lesotho tjee joalo ka naha ea Bokreste ho a

lokeleha hore ka nako ena re lebohe Morena
Molimo ka tsoalo ea Morena Jesu le ho kopa
mahlohololo a selemo se secha, ka ho ea
likerekeng tsa rona ho ea rapela.

Ke qetella ka ho lakaletsa Motlotlehi le lelapa la
hae le sechaba sohle sa Basotho Keresemese e
monate e se nang matšoenyeho le ho ba lakaletsa
mahlohonolo a selemo se secha.

**Molimo o re hlohonolofatse bohle;
Molimo o boloke Lesotho le Basotho.**

Khotso! Pula!! Nala!!